

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 12, No. 373

原始資料: 蕭鎮國大德提供, 維習安大德提供之高麗藏 CD 經文, 北美某大德提供

No. 373

後出阿彌陀佛偈

古舊錄云闕譯人名今紀後漢錄

惟念法比丘	乃從世饒王
發願喻諸佛	誓二十四章
世世見諸佛	炫數無有量
不廢宿命行	功德遂具成
世界名清淨	得佛號無量
國界平夷易	豐樂多上人
寶樹若干種	羅列叢相生
本莖枝葉花	種種各異香
順風日三動	翕習如花生
墮地如手布	雜廁上普平
一切無諸山	海水及諸源
但有河水流	音響如說經
天人入水戲	在意所欲望
令水齊膈肩	意願隨念得
佛壽十方沙	光明普無邊
菩薩及弟子	不可算稱量
若欲見彼佛	莫疑亦莫忘
有疑在胎中	不合五百年
不疑生基坐	叉手無量前
願欲遍十方	須臾則旋還
惟念彼菩薩	炫劫作功勤
本行如此致	得號會世尊
佛興難得值	須臾會難聞
講說士難遇	受學人難得
若後遭末世	法欲衰微時
當共建擁護	行佛無欲法

佛能說此要 各各勤思行
受此無量福 世世稽首行
後出阿彌陀佛偈